

SAMSPEL
BEREKRAFT
NYSKAPING



Fakultet for økonomi og samfunnsvitenskap

STRATEGI
2019–2023



Høgskulen
på Vestlandet

Om fakultetsstrategien

Hausten 2018 har det gått føre seg eit intensivt arbeid med å stake ut retninga for verksemda ved Fakultet for økonomi og samfunnsvitskap dei neste fem åra. Arbeidsgruppene som blei satt ned av styringsgruppa, har samla forslag til fakultetsstrategi i eit dokument med tre delar. Det har vore gjennomført to fakultetsamlingar med strategi som formål, og strategispel har vore samla frå instituttmøta. Strategien skal rullerast i løpet av strategiperioden.

Første delen omhandlar FØS sin identitet. Her er ei kortfatta skildring av kva for eit fakultet FØS er i 2018. Som eit nytt fakultet er vi i støypeskeia, og vi skal derfor bruke tid på å bygge samarbeid og fellesskap på tvers av både institutt og campus.

Andre delen omhandlar målsettingar og tiltak for strategiperioden. Strategien tar sikte på å peike ut retning og prioriteringar for at fakultetet skal nå dei overordna måla til fakultetet og HVL. Målsettingane er hovudsakleg på eit overordna nivå og er delt inn i utdanning, forskning og utvikling, og formidling. I tillegg er bygging av fakultetet eit særleg viktig innsatsområde for perioden. Det er institutta sine strategiar og handlingsplanar som skal operasjonalisere dei enkelte måla. Det er nødvendig med felles prioriteringar for å oppretthalde og

vidareutvikle handlingsrom og kvalitet i ulike delar av verksemda.

Tredje delen omhandlar dei felles faglege satsingsområda som HVL har skissert i den overordna institusjonsstrategien. HVL har i tillegg til den overordna satsinga på universitetsstatus med ein profesjons- og arbeidslivsprofil, definert sju felles faglege satsingsområde, der fakulteta samla skal bidra inn med kompetanse og tyngdepunkt. Denne delen omhandlar korleis FØS bidrar og skal bidra inn mot institusjonen sine satsingsområde.



Ambisjoner for 2023

- > Utdanningane ved fakultetet er FoU-baserte, møter samfunnsmessige utfordringar og har fokus på å utdanne kunnskapsrike og ansvarlege kandidatar som har kompetanse til å gå inn i dei ulike rollene dei får i arbeidslivet
- > Fakultetet har utvikla eit sterkt fellesskap som er prega av samarbeid, vilje og tillit
- > Vi har gode ordningar for mobilitet for studentar og tilsette, og internasjonalisering i alle utdanningssyklusar
- > FØS har sterke, levande campus med studentar som lykkast og trivast
- > FØS anerkjenner verdien av gode undervisarar
- > Vi arbeider aktivt for likestilling og mangfald blant studentar og tilsette
- > FØS inviterer fagtilsette frå andre

- fakultet inn i våre forskargrupper og utdanningar og stimulerer til samarbeid med forskargrupper på andre fakultet.
- > FØS bidrar til innovasjon gjennom evna vår til å forbetre, forenkle og fornye produkt og tenester og utdanne studentar som kan bidra i og til endringsarbeid i eit tett samspel mellom utdanning, forskning, samfunn, arbeids- og næringsliv
- > Dei tilsette tar aktivt del i samfunnslivet med formidling av forskning og utviklingsarbeid og bidrar med å belyse aktuelle samfunnsspørsmål
- > Utdanningane våre og forskinga vår held høg etisk standard og viser eit tydeleg samfunnsansvar i berekraftig perspektiv
- > FØS har som mål å vere ein viktig fagleg drivar for HVL sine felles faglege satsingsområde

Fakultetet i 2018

FØS blei etablert 1. januar 2018. Per 2018 har fakultetet i overkant av 2000 studentar og 120 tilsette fordelt på tre campusar – Bergen, Haugesund og Sogndal. Fakultet tilbyr utdanningar på bachelor-, master og ph.d.-nivå og tar opp studentar til både teoretiske, arbeidsretta disiplin-fag og profesjonsutdanningar. I tillegg til ph.d.-programmet i nautiske operasjonar, er ein søknad om akkreditering av ph.d.-utdanning i ansvarleg innovasjon og regional utvikling (Responsible innovation and regional development) til handsaming hos NOKUT. Fakultetet er administrativt ansvarleg for programmet. Utdanninga er ei tverrfagleg satsing mellom FØS, FIN og FHS.



Fakultetet har eit tett samarbeid med samfunn- og arbeidslivet i heile regionen. Dette gir mellom anna utslag i forskingssamarbeid og ein brei portefølje knytt til etter- og vidareutdanning.

Det mangearta studietilbodet gir unike moglegheiter for samspel mellom fagområder og disiplinær internt i fakultetet, men også ut over fakultetsgrenser.


Fakultetet er organisert med tre institutt og eitt senter:

- > Institutt for økonomi og administrasjon (IØA)
- > Institutt for samfunnsvitenskap (ISV)
- > Institutt for maritime studium (IMS)
- > Maritimt kompetansesenter

Utdanning i FØS

FØS har eit studietilbod frå bachelor til ph.d. og tilbyr studiar innan fagområde som økonomi og administrasjon (med fleire profilar), reiseliv, eigedomsmeistring, juss, sosiologi, historie, nautikk og maritime studium. Fakultetet har eit breitt samarbeid med andre fagmiljø ved HVL innan både undervisning og forskning og bidrar mellom anna inn i utdanningsprogram ved FIN, FHS og FLKI. FØS tilbyr ei brei og tverrfagleg studieportefølje som er nødvendig for at studia våre er tidsriktige og tett kopla til behova i samfunns- og arbeidslivet rundt oss. I tillegg tilbyr FØS kortare program, som årsstudium i jus (S), logistikk (B), samfunnsfag (S), ungdoms-sosiologi (S) og historie (S).


Figuren under viser programma som fakultetet tilbyr i porteføljen sin.



Forskning i FØS

Forskninga ved FØS er tverrfagleg og mangearta, men er samtidig kjenneteikna av ei orientering mot aktuelle samfunnsmessige utfordringar og praksisnære problemstillingar knytt til dei ulike fagområda og utdanningsprogramma i institutta.

Teknologiske, sosiale, kulturelle og miljømessige endringar krev samspel mellom ulike samfunnsinstitusjonar og sektorar, i tillegg til ei tverrfagleg tilnærming. FØS sitt bidrag i denne samanhengen handlar om ei heilskapleg og tverrfagleg forståing av organisering, samfunnsutvikling og næringsutvikling i regionalt, nasjonalt og internasjonalt perspektiv.



Figur 2 Forsking ved FØS

Forskninga i FØS kan så langt kategoriserast i 6 område. Desse er knytt til:

- > **Ansvarleg innovasjon** (fornyng og kvalitetsutvikling i offentleg sektor, offentleg/sosial innovasjon, opplevingsbasert reiseliv)
- > **Berekraftig utvikling** (energipolitikk og det grønne skiftet, energi-, klima og miljøhistorie)
- > **Danning, etikk, samfunnsansvar** (profesjon, etikk og samfunnsansvar, kultur og danningshistorie, kunnskap, utdanning og klasse)
- > **Sikkerheit** (organisatorisk sikkerheit og styringssystem, maritime operasjonar og maritimt regelverk)
- > **Økonomi, organisasjon og leiing** (Metodar og modellverktøy i regional økonomi, regional økonomi, offentlege styringsformar, reformer og politikktutforming, interorganisatorisk samspel og leiing, organisasjonslæring, teknologileiing, kommunikasjon og leiing i organisasjonar)
- > **Mobilitet, demografi og historie** (Lokal og regional historie, ungdom, mobilitet og demografi)

Satsingsområda i HVL legg føringar og premisser for strategiske val. Det har vore gjennomført, eller er under planlegging, samlingar på tvers innan ulike forskingsområde. Innan 30. juni 2019 skal det etablerast ein ny forskingsstruktur i fakulteta, som inneheld få og robuste forskingsgrupper/-program. Under kvar forskingsgruppe/-program vil det koplust fleire dynamiske forskingsprosjekt. Forskningsgruppene/-programma skal spegle fakultetet og HVL sine satsingsområde, og skal støtte opp under og bidra særleg inn i master-, og ph.d.-utdanningane.

Mål og tiltak for strategiperioden

For strategiperioden har FØS formulert åtte hovudmål med tilhørande delmål og satsingar. Hovudmåla er bygd rundt kjerneoppgåvene våre og samfunnsoppdraget om å drive utdanning, forskning og formidling av høg kvalitet. Samhandling, internasjonalisering og digitalisering er viktige verkemiddel i alle målområda.



Fakultetet sin strategi er konkretisert i instituttvis strategiar, samt handlingsplanar som blir revidert årleg. Handlingsplanane operasjonaliserar årlege prioriteringar, verkemiddel og tiltak som skal gjennomførast for å nå måla i strategien.

Den første fireårsperioden er det behov for å konsentrere innsatsen rundt nokre utvalde område. Fakultetet prioriterer felles satsingar som dekkjer flest mogleg av måla satt av sektoren og HVL. Områda er i hovudsak konsentrert rundt:

- > motiverte og oppdaterte tilsette
- > studentar som lykkast og trivast
- > attraktive og relevante studieprogram og levande campus
- > sterke forskargrupper/-program
- > samarbeid med omgjevnadene

Fakultetsbygging

FØS er eit tverrfagleg fakultet med høg kompetanse og som spenner breitt fagleg og geografisk. Fakultetet har dei rette føresetnadane for å delta i både tverrfaglege forskings- og utdanningsoppgåver innanfor dei felles faglege satsingsområda til HVL og i møte med dei samfunnsutfordringane vår tid står ovanfor.

Å bygge eit fakultet og eit fellesskap er eit særleg innsatsområde og eit mål som fakultetet vil prioritere i perioden framover.

Mål 1: Bygge eit fellesskap kjenneteikna av samarbeid, vilje, tillit og respekt. FØS skal legge til rette for tverrfagleg samarbeid slik at fakultetet blir ein viktig nasjonal bidragsytar innan sine fagområde, og disiplinfga si rolle og relevans i profesjonsutdanningane blir fremma.

For å oppnå dette, skal vi

- > arbeide for eit stimulerande, utviklande og inkluderande arbeids- og studiemiljø forankra i gjensidig respekt, kulturelt mangfald og medbestemming
- > etablere møteplassar og gjennomføre opne prosessar med oppmoding til deltaking og meningsytring
- > ha god og tilstrekkeleg administrativ støtte fordelt på campus - tett på studentar og tilsette

- > sikre godt leiarskap gjennom satsing på leiar- og kompetanseutvikling på alle nivå
- > målrette kompetanseutvikling for tilsette i alle stillingskategoriar, i samsvar med det behovet fakultetet har og mot/i tråd med universitetsambisjonen
- > bygge system for kompetanseoverføring mellom fagtilsette (knytt til utdanning, forskning, formidling)
- > utnytte moglegheitene i digitale verktøy
- > skape handlingsrom og legge til rette for at FØS og institutta har kapasitet til å vere ein aktiv aktør for forskningssamarbeid, utviklingsprosjekt, klyngesamarbeid, FoU og anbod mv. mot eksterne aktørar

Utdanning

Mål 2: Fakultetet skal utdanne kompetente, kritiske og ansvarlege kandidatar som er ettertrakta i samfunns- arbeids- og næringsliv

For å oppnå dette, skal vi

- > framleis vektlegge bachelorutdanningane som grunnfjellet i verksemda vår
- > styrke utdanningane ved at bachelorutdanningane i FØS får tilbod om praksis
- > tilby masterutdanning som kan gi siviløkonomitittel ved alle campus innan 2020
- > vedlikehalde og styrke eksisterande masterprogram
- > tilby tverrfaglege studieprogram og emne for å møte komplekse utfordringar i samfunnet
- > styrke studentane si digitale og fagleg relevante kunnskap og kompetanse
- > legge til rette for og oppmode til internasjonalisering for studentar og tilsette
- > bidra aktivt til å utvikle og integrere etikk, samfunnsansvar og berekraftperspektiv i alle utdanningane ved FØS og HVL
- > skape økonomisk handlingrom ved å hente synergjar på tvers av campus

Mål 3: Fakultetet skal arbeide for å betre utdanningskvaliteten

For å oppnå dette, skal vi

- > støtte og vidareutvikle fagleg, pedagogisk, formidlings- og digital kompetanse hos alle tilsette

- > utvikle eit system for kontinuerleg vidareføring og forbetring av kvaliteten i undervisninga. Systemet skal institusjonaliserast og forplikte fakultetet til å gi undervisarane dei vilkåra og oppmuntringane dei treng for å oppretthalde og forbetre si undervisning. Ein skal sikre at god undervisning bli anerkjent.
- > i samarbeid med studentane skape gode læringsmiljø gjennom levande campus
- > sikre tett og god oppfølging av studentar, både fagleg og administrativt
- > jobbe systematisk med rekruttering av studentar
- > jobbe systematisk med rekruttering av fagtilsette nasjonalt og internasjonalt - sikre stabil bemanning over tid
- > samarbeide med og invitere relevante fagtilsette frå andre institutt og fakultet inn i våre utdanningar, inkludert utvikling av nye utdannings- og emnetilbod
- > vere ein pådrivar for at studentane deltar i forskings- og utviklingsaktivitet
- > gjennom bachelorprogramma oppmuntre og stimulere studentar til å fortsetje i masterprogram
- > oppmuntre og stimulere til å auke produksjon av fagbøker og læremateriell- og på engelsk
- > tilby studentane ved alle campus engelske emne tilsvarande eit semester/ 30 studiepoeng

Mål 4: Fakultetet skal forvalte og vidareutvikle eit breitt og tverrfagleg studietilbod for livslang læring (EVU/BOA), i dialog med samfunns-, arbeids- og næringsliv

For å oppnå dette, skal vi

- > nytte breidda i fakultetet sin portefølje og den samla kompetansen i fakultetet slik at fakultetet kan tilby tverrfaglege og relevante emne/studieprogram nasjonalt/internasjonalt
- > bidra til å skreddarsy studieprogram og emne frå HVL si samla portefølje for å styrke vår nasjonale posisjon
- > utvikle fleire studium støtte av digital teknologi
- > tilby gjennomgåande studieløp innan fleire av fakultetet sine fagområde
- > opprette alumni-nettverk innan fakultetet sine fagområde
- > skape økonomisk handlingrom ved å auke oppdragsmengda knytt til etter og vidareutdanning

Forskning og utvikling

Mål 5: Fakultetet skal ha forskingsmiljø av høg standard

For å oppnå dette, skal vi

- > auke andelen førstekompetanse til 70%
- > auke talet kvinner i faglege toppstillinger
- > utvikle ein integrert og robust forskingsstruktur på tvers av campusane, som speglar satsingsområda og dei faglege perspektiva i fakultetet
- > utarbeide ein plan for å systematisk bygge kompetanse i forskingsleiing ved alle campus
- > styrke nasjonale og internasjonale nettverk og samhandle tett med forskingsadministrasjonen for å få tilslag på fleire større forskingsprosjekt finansiert av EU og andre eksterne kjelder
- > tilsette fleire internasjonale professor II-stillingar for å styrke forskning og utdanning i fakultetet
- > tiltrekke oss fleire kvalifiserte søkjarar til ph.d.-utdanningane (nasjonalt og internasjonalt) og auke talet på eksternfinansierte stipendiatar, nærings- og offentleg-ph.d.
- > arbeide for å tilby konkurransedyktig FoU-tid på nivå med utdanningar vi samanliknar oss med
- > skape økonomisk handlingrom ved å auke tilfanget av eksterne forskingsmidlar
- > invitere fagtilsette frå andre institutt/fakultet til samarbeid om eksterne forskningssøknader og deltaking i FØS sine forskargrupper.

Mål 6: Alle fagområda ved FØS skal drive forskning og utvikling forankra i sine faglege perspektiv og innan dei felta som dei utdannar for

For å oppnå dette, skal vi

- > sikre at fagleg tilsette tek aktivt del i forskingsgrupper/program i og på tvers av fakultetet og saman med andre institusjonar
- > gjennomføre tiltak for heve forskingskompetansen i personalet
- > legge til rette for og oppmode aktuelle tilsette for kompetansehevingsløp, og ha god infrastruktur som støttar opp om forskarar med mindre erfaring

- > trekke bachelor- og masterstudentar inn i FoU-prosjekt og forskargrupper
- > gjere studentar kjent med og interessert i forskning og utvikling, også som karriereveg (t.d. presentasjon av master- og ph.d.-prosjekt i bachelorprogram, studententreprenørskap)
- > synleggjere forskning og utvikling i alle studieprogramma ved fakultetet (t.d. forskingsdagar kopla til undervisning)

Formidling og deling av kunnskap

Mål 7: Auke graden av deltaking i offentleg ordskitte

For å oppnå dette, skal vi

- > oppmode tilsette til å gjennomføre kurs knytt til språk, presentasjonsteknikkar og bruk av ulike kanalar (SoMe, aviser, TV/radio)
- > stimulere studentar og tilsette til deltaking i det offentlege ordskitet
- > i aukande grad publisere/formidle fagleg stoff i lokale og nasjonale media
- > invitere samfunns-, arbeids- og næringsliv til faglege møte og debattar på studiestadane
- > synleggjere studentar og deira forskning gjennom bachelor-, master- og p.hd.-oppgåver

Mål 8: FØS skal vere godt synleg for omverda (for potensielle studentar, samfunn og arbeidsliv)

For å oppnå dette, skal vi

- > synleggjere studentane og deira forskning
- > etablere fagdagar, invitere til seminar, konferansar og liknande.
- > ta i bruk digitale verktøy, metodar og kunnskap for å utvikle og formidle forskingsbasert kunnskap
- > etablere alumnus-ordningar i alle institutt
- > oppmode og legge til rette for at tilsette deltar i eksterne utval og på relevante arenaer
- > legge til rette for samhandling mellom FoU-miljø og samfunns-, arbeids- og næringsliv
- > invitere inn gjesteførelesarar frå praksisfelt, samfunns-, arbeids- og næringsliv, samt professor II-tilsette

Faglege satsings- område

Strukturen til FØS er grunngeve i faglege fellesskap og profesjonane og faga sin eigenart. Institutta sine faglege eigenartar gjer at fagmiljøa enklare kan stå fram på eige grunnlag, noko som gir ei trygg og produktiv ramme for tverrfagleg samarbeid innan og utanfor fakultetet.



Utdannings- og forskingsaktiviteten ved FØS tar utgangspunkt i fire faglege perspektiv, som ofte inngår i tverrfaglege utdanningsprogram og forskingsaktivitetar.

- > Det økonomiske perspektivet fokuserer på verdiskaping og innovasjon i næringsliv og samfunn, men også på fordelingsverknadene av økonomisk endring og innovasjon mellom og innan regionar og sosiale grupper.
- > Det administrasjons- og organisasjonsfaglege perspektivet er breitt og fokuserer på den eine sida om organisasjonar, leiing og offentleg forvaltning som verktøy for styring, leiing, samfunnsutvikling, næringsutvikling og tryggleik. På den andre sida dreiar det seg om makrotrekk i utviklinga av institusjonar og komplekse organisasjonsfelt som gjer dei til avgrensande rammer for styringsambisjonane våre.
- > Det historisk- sosiologiske perspektivet er innretta mot å forstå og forklare utviklingsprosessar og mønster i samfunnet, og slik bidra til samfunnet si sjølvforståing, danning og refleksjon.
- > Den maritime utdanninga og forskinga tar opp i seg element som tryggleik, leiing og næringsutvikling, og inkorporerer også teknologiske tilhøve med målsetnad om å forstå korleis menneske, teknologi og organisasjon påverkar kvarandre.

Profesjons- og arbeidslivsretting

HVL har mål om å bli eit universitet med ein tydeleg profesjons- og arbeidslivsretta profil. FØS vil bidra aktivt til dette målet gjennom kombinasjonen av praksisnær og teoretisk forskingsbasert kunnskap og gjennom tette koplingar til samfunn-, arbeids- og næringsliv.

FØS skal bidra til teoriutvikling og til kunnskap om profesjonsetikk. FØS bidrar med disiplinorientering inn i profesjonsutdanningar på andre fakultet. Samtidig koplar vi teori og praksis gjennom å tilby praksis som emne på alle institutt.

Området skal sikre fagutvikling og kritisk refleksjon av kunnskapsgrunnlag for yrkesutøvarane som vi utdannar. Profilen balanserar mellom akademisk og praksisbasert kunnskap i ulike utdanningar og forholdet til forventningar frå omgjevnadene.

FØS har ambisjonar om å ta ein leiande rolle i dette felles faglege satsingsområde.

Ansvarleg innovasjon og berekraftig utvikling

Innovasjon er eit tverrfagleg forskingsfelt som dreier seg om nyskaping i eit verdiskapingsperspektiv. I ansvarleg innovasjon ligg det at vi skal bidra til samfunnet sitt beste gjennom t.d. verdiskaping, og at dette skal gjerast med eit berekraftig perspektiv i utviklinga. Ansvarleg innovasjon skal koplust til FN sine mål for berekraft, som ser miljø, økonomi og sosial utvikling i samanheng.

I FØS skal vi arbeide for å synleggjere tematikken i studieprogramma. I utdanningssamanheng betyr det at studentane våre, ut over å ha solide kunnskapar om fagfeltet, skal kunne vareta den etablerte fagkunnskapen og bidra til nyvinning og endring der det er formålstenleg.

Innan det største instituttet (IØA) har ny rådgivande plan løfta fram eit nytt fagområde; etikk, samfunnsansvar og berekraft (ESAB) for å synleggjere dette området. Mellom anna blir det framheva at kandidatane skal bidra til å fremme evna til innovasjon og omstilling i ulike verksemder, og dei skal vere i stand til å handle forsvarleg og forstå verknader av samfunnsmessige avgjerder.

Vidare skal dei forstå korleis endringar i samfunnet, som t.d. berekraft, globalisering og teknologiutvikling påverkar verksemder, og korleis verksemder

utøver aktivitetane sine på ein etisk forsvarleg måte som varetar inter-essentane samtidig som FN sine mål for berekraft varetakast.

I forskningssamanheng skal FØS bidra med å vidareutvikle nasjonale og internasjonale FoU-relasjonar på området. Ansvarleg innovasjon og berekraftig utvikling i FØS er sentralt i fleire av forskingsfelt ved FØS, som sosialt entreprenørskap, industriell innovasjon og det grønne skiftet.

Innovasjonsforskninga i organisasjonsfaga rettar seg hovudsakleg mot institusjonelle innovasjonar, forstått som etablering av nye praksisar og organisasjonsformer både på eit overordna styringsnivå og i dei enkelte tenestene. Ansvarleg leiing, organisasjon og økonomi, sosiologi og historie skal gi kunnskap som bidrar til økonomisk, sosial og miljømessig berekraft.

I tillegg er forskning på kva for kompetanse som er naudsynt i arbeidslivet som resultat av teknologisk innovasjon viktig. Dette kan til dømes vere utviklinga av autonome skip og brukarorienterte helse- og velferdstenester, eller digitalisering og robotisering i tenesteyting og industriell produksjon.

Danning

Når HVL skal realisere universitetsambisjonen, treng vi fagmiljø som fokuserer på danning, refleksjon og kritisk kunnskapsutvikling. Danning er sentralt i forskings- og utviklingsarbeid knytt til profesjon- og arbeidslivsorientering.

I utdanning- og forskningssamanheng inneber dette at alle ferdigutdanna kandidatane ved FØS skal vere i stand til å kunne utøve eigen refleksjon og kritisk vurdering. Kandidatane skal vere beviste eigne haldningar og korleis desse påverkar eigen åtfærd og avgjerder.

Teknologiutvikling vil til dømes sette standard for kva for verktøy ein må mestre i dei ulike profesjonane og utfordrar slik kandidatane sine evner til kritisk å kunne vurdere bruken av desse. Studentane ved FØS skal trenast i vitskapleg metode, både gjennom forskingsbasert undervisning og spesifikk undervisning i temaet.

FØS vil ha fokus på praksis og praktisk trening/øving i studieprogramma. Den tette koplinga mellom teori og praksis skal syte for at studentane kan reflektere over erfaringar og kunnskap som dei opparbeider seg.

Danning i forskning og utdanning gir høve til å fremje perspektiv, teoriar og handlingar som gjer at studentar og tilsette betre kan forstå den verda vi lever

i, og samtidig gjere oss i stand til å endre ho til det betre. Danning skal bidra til at personar skal kunne ta i bruk kunnskap med klokskap i samanhengar som ofte vil vere komplekse og nokre gonger kritiske. Det set søkelys på eigenskapar som ikkje kan direkte lærast eller målast, men som ein kan og bør øve på. Danning omfattar heile mennesket - individuelt og relasjonelt - i samfunn og kultur, gjennom kritisk refleksjon, etisk handling, visdom og endring.

Teknologi

FØS satsar på å utdanne kandidatane som er rusta til å møte den raske teknologiske utviklinga i arbeidslivet, slik at dei kan bidra til fornying, forenkling og anna utviklingsarbeid. På denne måten evnar kandidatane å forankre og gjennomføre endringsprosessar ved bruk av digital teknologi på ein forsvarleg måte, og dei sikrar sluttbrukarane trygge og gode tenester.

FØS legg vekt på at kandidatane skal ha kunnskap og kompetanse om moglegheiter og utfordringar knytt til digitalisering og teknologibruk på individ-, organisasjons- og samfunnsnivå, og dei skal kunne reflektere rundt og drøfte personvern, etiske, sikkerheitsmessige, menneskelege og organisatoriske spørsmål knytt til det digitale skiftet.

Både studentar og tilsette i FØS skal vere kritiske i vurderinga av nye teknologiar, samstundes som dei er nyfrikne og nyttar arbeidslivsrelevante digitale verktøy, teknikkar og uttrykksformar.

I FØS forskar ein på avanserte IT-teknologiar som bidrar til effektivisering av ulike prosessar og til å løyse (store) utfordringar i arbeidslivet.

Sikkerheit

FØS si satsing på sikkerheit skal bidra til meir effektivt og kunnskapsbasert sikkerheits- og utviklingsarbeid gjennom sterke og tverrfaglege utdanningar og forskingsprogram.

Sikkerheit er viktig for samfunn og individ, og omgrepet sikkerheit er sentralt i all utvikling. For FØS er utdanning og forskning innan dette området knytt til fleire utdanningar og forskingsområde, mellom anna maritim sikkerheit, beredskap, økonomisk sikkerheit, organisasjonssikkerheit, cybersikkerheit og mellommenne-skelege relasjonar.

Ved å gi kandidatane kunnskap om lovverk, misbruk, avvik, uønskte hendingar og risikohandtering, ønsker FØS at kandidatane våre kan gå ut i arbeidslivet med høgare medvit om korleis dei sjølve kan bidra til auka samfunnssikkerheit og tryggleik, t.d. innanfor helse og omsorg, i skuleverket, maritim næring osv.

Mangelfull kunnskap blant studentane om personvern, datalagring og utfordringar ved kopling av store data-register, er så langt gitt liten merksemd i undervisninga. Å gjere dette stoffet relevant for våre studentar og synleggjere moglege konsekvensar for deira eiga og samfunnet si sikkerheit, vil vere ei viktig oppgåve.

Over lengre tid har fagtilsette på masterstudiet i organisasjon og leiing forska på og rettleia tematikkar som mellom anna pasienttryggleik og risiko- og avvikshandtering. HVL har også nasjonalt og internasjonalt sterke og anerkjende fagmiljø som er relevant for doktorgradsutdanninga i nautiske operasjonar.

Folkehelse

Sjølv om FØS i hovudsak vil rette merksemd og fokus mot dei andre felles faglege satsingsområda, forskar FØS også på og underviser i tematikkar knytt til folkehelse, t.d. frå ein organisasjons-, helse- og/eller velferdsfagleg ståstad.



